

國朝柔遠記



國朝志



覽 寰
見 瀛

一

國朝柔遠記卷十九

臣 彭玉麟敬定

臣 王之春恭譔

瀛海各國統考

昔吉甫著獫狁之功李牧樹匈奴之望漢繫單于之頸唐
犁突厥之庭大丈夫手揮十萬橫磨劍縱橫邊外勒天山
碑鐫燕然銘然後入玉門關封萬里侯誠得志於時者之
所爲也然古之所謂立功塞外者不過如禹貢之荒服職
方之蕃國與中國相距實不甚遠卽史傳所稱昆堅丁零
黠戛斯大秦骨利幹諸國亦屬張皇王會之盛而偶通重
譯耳若騶衍九州之說山海十洲之書尤爲傳聞髣髴渺

而無據地球九萬里誰能畫井計疆而學章亥之步也哉
自有明中葉西班牙葡萄牙荷蘭航海西來中土始有西
人之跡逮我朝守在四夷而利碼賓陽碼諾湯若望南
懷仁穆尼閣柰端輩接踵相望而後五大洲之國喁喁向
化誠開虞夏商周漢晉唐宋元明四千餘年未有之局今
試按其地而計之在東南曰亞細亞洲其地東距東洋中
國在焉餘則有朝鮮日本琉球及俄羅斯之東境西距紅
海黑海地中海其國則有五印度阿剌伯南距印度海其
國則有越南暹羅南掌緬甸及南洋羣島北距冰海其國
則有布哈爾波斯愛烏罕俾路芝基發諸回部及土耳其
之東中兩境此亞細亞洲之大略也在西北爲歐羅巴洲

黃海注其中黑海界其東地中海橫其南大西洋海浮其西烏拉大山亙其北都於黃海東岸之彼得羅堡者俄羅斯也都於西岸之斯德哥爾摩者瑞國也都於南岸之哥卑的給者丹國也迤東爲普魯士之東部其都曰伯靈瑞國之西爲瑙威其都曰格里士特阿拏丹國之南普魯士之西爲日耳曼實居歐羅巴洲之中普魯士之南日耳曼之東爲奧地利亞其都曰維也納奧地利亞之東南枕黑海接亞細亞界爲土耳其其都曰君士但丁土耳其之南爲希臘其都曰亞德納斯日耳曼之南爲瑞士瑞士之南斗入地中海爲意大里亞列國日耳曼之西北臨大西洋海爲荷蘭其都曰亞摩斯德耳登荷蘭之南爲比利時其

都曰不魯舍拙斯曰耳曼之西比利時之東爲普魯士西部兩部夾日耳曼之左右蓋普魯士本日耳曼所分之國也比利時之南普魯士西部之東南瑞士之東爲法蘭西其都曰巴黎斯法蘭西之西南爲西班牙其都曰馬特西班牙之西臨大西洋海曰葡萄牙其都曰里斯波亞法蘭西之西北有倫敦蘇格蘭阿蘭爾三島鼎峙海中爲英吉利倫敦卽英吉利之所都也此歐羅巴洲之大略也在西南爲阿非利加洲其地廣莫而荒昧僅東北一隅近印度海紅海地中海其國則有埃及一曰麥西弩北阿阿北西尼亞等國在西爲亞墨利加洲分爲南北兩境南亞墨有巴西字露

卽秘魯

智利波非利亞金加西臘等國北亞墨之

大國爲米利堅

卽花旗

小國爲墨西哥餘無所聞焉此亞墨

阿非兩洲之大略也又南洋之極東有大荒島曰澳大利

亞又曰南亞細亞卽世所稱新金山也其地自爲一洲約

二萬餘里荒曠無人近人比之亞細歐羅亞墨利加阿非

稱爲五大洲而實英人之所闢卽英吉利遙領之屬地也

故論五洲之土地亞細爲最大亞墨頗與之相埒阿非視

亞細之半歐羅視阿非之半澳大僅甌脫耳而論各國之

強弱阿非之埃及等國雖聲教稍通實受役於歐羅北亞

墨之米利堅於乾隆四十年華盛頓奮其沈雄之才卓然

崛起駿乎有若敖蚡冒以啟山林之勢與英吉利血戰八

年遂割亞墨之南境而國以立地廣人眾通商最多勢與

歐羅諸大國抗衡風土略近中國流寓多華人而克累弗
尼亞省尤眾世稱舊金山卽其地也然自開創以來分國
爲二十餘部不以位傳子孫而以伯里璽天德主之四歲
一易退位者與齊民齒民無常主而百餘年恰無爭戰之
事誠非好大喜功之國南亞墨之孛露邇歲始通中國而
相去益遠地小而貧故談海防者不急於阿非亞墨澳大
三洲而在於東西南三洋東洋卽亞細之東境日本在焉
自秦時立國西漢時卽與中國通隋唐宋屢入貢元范文
虎伐之無功明代復通貢然數犯邊稱倭寇焉 國初通
國書定銅船采買之制同治中始立和約近日效法泰西
而衣冠易唐制度禮樂非漢文章矣惟能禁鴉片西天主

教不使之入境足以差強人意其地與高麗琉球相毗東
與俄鄰旣與高麗立約而於琉球則滅之識者已知其非
無意於高麗也西洋卽歐羅諸國以俄羅斯爲最大英吉
利法蘭西普魯士皆強盛勢可相敵若土耳其若奧地利
亞地土雖大而已日就頹弱其餘小國鱗次櫛比錯雜其
間諸大國各肆其鯨吞蠶食之心互相兼并互相猜忌亦
互相救援頗似春秋五伯爭雄之世而俄羅斯爲諸國所
忌因忌生嫉合縱而連橫又成戰國同謀抗秦之局俄之
土地東有西伯利八部界中國之北面西連高加索五部
南鄰印度遠包中國之西面迤北則波羅的海東五域三
十七部再西則波蘭十四部又跨海逾墨領峽據北亞墨

利加之一隅曰監加札隸西伯利部康熙中擾我索倫立
碑定界遂通商於車臣汗部之恰克圖其後日益南向道
光中脅降西域回部布哈爾諸族通波斯以噬印度漸與
後藏相鄰咸豐中兩次請地自黑龍江以東雅克薩尼布
楚諸城烏魯木齊以西伊犁庫車阿克蘇諸城皆割而據
之而喀什噶爾葉爾羌乘機竊據同治十三年以重兵降
回部之基發通道於巴克達山至北印度之克什米爾幾
有漢陽諸姬楚實盡之之患又東得日本薩莫蝦夷之地
以科爾立十八島易之更跨東海繞出高麗之東開礦采
煤鐵近又駐兵黑龍江界將營造火車路以通中國雖因
通商日久歷二百年不敢開釁而其心未嘗不叵測也英

吉利倫敦五十二部蘇格蘭三十三部阿蘭爾三十二部
三島地輿廣輪不過中國一省惟屬地爲最多西得北亞
墨之北境東得五印度迤南得南洋羣島越海控馭皆在
數萬里之外建藩部四曰孟加臘曰麻打拉薩曰孟買曰
亞加拉孟加臘之東北緬甸之西北有阿薩密部本土夷
崇佛教英人據爲別部東距騰越猿夷怒夷隔之南距前
藏狷獮布魯克巴隔之去中國僅咫尺又南印度之南海
中大島曰錫蘭古狼牙修地英人滅之循海而東阿克刺
朗谷兩埠取之緬甸再東則有新嘉坡麻刺甲檳榔嶼三
埠地近暹羅又得澳大全洲又有別島曰搨日倫敦爲互
古人迹不到之處又由倫敦至澳大所經之地有太平洋

之飛幾島亦稱屬焉又有獅山諸地在阿非之西界特墨拉拉諸地在南亞墨之南界遙領之國誠有更僕難數者但倫敦三島地本徧小山澤之利開采殆盡惟仗印度爲外府兵餉皆取資焉近年英主稱徽號以印度綴國號之下其殆有平王東遷之志歟又聞謀開鐵路由印度以通雲南其殆有改趨西道之志歟未可知也法蘭西地方二千里建八十六部其人精於算學機器尤長於用兵號令如山萬足一步前者雖死後者不敢不進火器之利冠於泰西嘉慶時其王拏破崙第一百戰無前威行西士卒以弗戢自焚亦吳王夫差之流亞也同治中其王拏破崙第三與普國構兵爲普所虜其大臣踢矮士等復與普和改

用米利堅之俗不立君以首領統國政同治十年踢矮士
任首領十二年麥馬韓代之麥馬韓者拏破崙第三之大
臣兵敗不能死君亡不能救又從而代之而國人皆以爲
賢賢者固如是乎前咸豐八年以兵船往越之南圻先後
侵踞嘉定等省設西貢總督以治其地嗣復添造戰艦扼
富良江踞順化佔海防河內處處偏緊雖黑旗黨之劉永
福爲法所憚而孤掌難鳴正不能測其所終近又營埠暹
羅蓄意緬甸無非爲撤我藩籬之計也法誠無賴之尤者
也普魯士東西二境共八部本日耳曼所分之國地小於
法兵亦弱於法然其君臣勵精圖治卒能破法蘭西割其
愛勒塞斯洛脫七城之地仿之樂毅破齊不是過焉誰謂

小國之不能勝大國也亦在人之自彊而已德意志本三十六列國奉之爲主雄視四方卽英俄亦憚其彊盛惟時天主教盛行各國皆尊禮之而法蘭西爲尤甚獨德國大臣畢士麻克惡之盡奪教主之權繩以官法故教至德國而窮萬國公報云教人猛如虎貪如狼德意志搏而縛之剪其爪牙又云教人久持太阿德人奪其柄而擊之批其頰而扼其喉德之彊盛畢士之力居多故語其相業泰西之管夷吾也論其拒教又泰西之西門豹也畢士亦人傑也哉意大里亞爲歐羅巴古一統之國漢書謂之大秦其後日益衰微嘗爲土法所併屢滅屢復如楚縣陳封陳之舉至嘉慶二十年各國仿葵邱衣裳之會尋宋虢弭兵之

盟大會於維也納各反侵地修好息兵遂定其國爲九大
國有四曰羅馬教主踞之曰多斯加納曰薩爾的尼亞曰
拉布勒士小國有五曰巴爾麻曰摩德那曰盧加曰摩納
哥曰勝馬里虐道光二十八年薩爾的尼亞王威克安耳
依馬弩嗣位能中興其國咸豐十一年遂爲合眾國復故
號取羅馬都之收教主之權而國稱彊國焉土耳其本回
部崇瑪哈穆特之教與泰西殊趨其地分中東西三境東
境五部中境六部在亞細亞洲內西土八部都城所在俗
無彝倫政無綱紀屢爲俄人所侵陵同治十三年國主以
荒淫被廢是又蹈陳靈公之覆轍也奧地利亞盛時日耳
曼意大里皆其藩屬今則儕爲與國瑪加本其附庸近已